

Här Mars Di Bartolomeo  
President vun der Deputéiertechamber  
19, um Krautmaart  
L-1728 Lëtzebuerg

Lëtzebuerg, de 16. Dezember 2015

Här President,

Esou wéi d'Chambersreglement et virgesäit, bieden ech Iech, dës parlamentaresch Fro un den Här Premierminister weiderzeleeden.

*Den Artikel 38 vun der Direktiv 2013/30/UE, wou et ëm de Schutz vun de Mierer geet, gëtt iwwert e Gesetz (parlamentarescht Dokument 6878) ëmgesat. Am Rapport ass awer och den Hiwäis, datt een anere Punkt vun därselwechter Direktiv iwwert de groussherzoglecht Reglement vum 8. Januar 2015 ëmgesat ginn ass.*

*Dëst werft Froe vu prinzipieller, gesetzgeberescher a konstitutioneller Natur op.*

*Dowéinst wéilt ech dem Här Premierminister dës allgemeng Froe stellen:*

- 1. Sinn aner EU-Direktiven, am ganzen oder zum Deel, iwwert e groussherzoglecht Reglement ëmgesat ginn?*
- 2. Wa jo, kann d'Regierung eng Oplëschtung vun dësen Direktive ginn?*
- 3. Ass d'Regierung der Meenung, datt et richteg ass, EU-Direktiven ëmzesetzen, ouni dofir d'Zoustëmmung vun der Chamber a Form vun engem Gesetz ze hunn?*
- 4. No wéi enge Kritären decidéiert d'Regierung, eng EU-Direktiv ouni d'Zoustëmmung vun der Chamber ëmzesetzen?*
- 5. Op Grond vu wéi engem Artikel aus der Verfassung ass et méiglech, EU-Direktive ganz oder zum Deel ouni Gesetz ëmzesetzen?*

*Méi speziell iwwert d'groussherzoglecht Reglement vum 8. Januar 2015: dëst beriff sech op dat modifizéiert Gesetz vum 9. November 1990 iwwer de Registre maritime. Et geet am Reglement ëm d'Exploitatioun vu Pëtrol a Gas am Mier.*

- 1. Op wéi en Artikel aus dem Gesetz vum 9. November 1990 iwwer de Registre maritime bezitt sech dat d'groussherzoglecht Reglement?*
- 2. Wann d'groussherzoglecht Reglement sech net op e konkreten Artikel bezitt, besteet dann net d'Gefor, datt d'groussherzoglecht Reglement vum 8. Januar 2015 virun de Richter ka kontestéiert ginn?*

Mat déiwem Respekt



Fernand Kartheiser  
Deputéierten